

Pahati ma Surah

Assalamu Aleykum wa Rahmatullahi Taala Wa Barakatuh. Pahati ni kamemon dowranakan bangsa Sama: panduh itu bey nisulat ley dikayuh wakil Sayyidina Nabi Isa Al-Masih, ya on-na si Yakub. Puwas peen dangeyn tahun Nabi Isa ley makapoleh ni sulgah, si Yakub tu ley tahinang dikayuh nakurah ma jamaa Al-Masihin ma Awrusalam. Bilang nakurah, niyah du sab panduh leh-na nulat supaya tapasampey ni saga jamaa ma kalahat-lahatan. Ya panduh-na ma jom sulat pasalan beteh ingga subey addat-tabiati maka kowl-piil-tabi, labi awla na bang kitabi ma jom katiksaan. Bilang palsukuan Tuhan, ya kahinangan-tabi subey magtowardah maka pagkahagad-tabi. Hati-na bang ihklas pangateyan-tabi magkahagad ma Tuhan, tantu subey nituman du sab leh-tabi saga panohoan-na.

Ma jom juran, niyah saga ayat siddi-siddi panduh tapiha-tabi.

Panalam 1:1

Panduh ni saga áa ma jom katiksaan 1:2-8

Panduh ni ádayahan maka ni ákulang-kabus 1:9-11

Panduh ma pasalan satsat 1:12-18

Panduh ma pasalan kowl-piil-tabi 1:19-27

Subey mba nipagbiddah manusiyah 2:1-13

Paltandaan pagkahagad 2:14-26

Subey nampan missara laat 3:1-18

Pangitau min Tuhan 3: 13-18

Pasekot ni Tuhan 4:1-12

Panduh ni ámantug ndi-na 4:13-17

Panduh ni ádayahan napsuhan 5:1-6

Subey iman-sabal ya nipalan 5:7-20

Satoggol-bi massa, mowmu niyah tandah-bi ayat taga kudlis beteh mamahi*. Bang niyah tandah-bi kudlis mamahi, hati-na, niyah nipahati leh ábey magmaana ya tabassa-bi min deyoan.

Na mura-murahan sasukul ámassa panduh itu nibuwanan leh Tuhan pangitau maka pangahati.

Yakub

1

¹ Assalamu aleykum. Aku si Yakub, dikayuh sasohoan Tuhan maka Saydina Isa Al-Masih. Itu aku masampey sulat ni kaam pagkahi-ku panubuh Nabi Yakub ya ley kowkanat ni kalahat-lahatan.

² Saga anak-danakan-ku, bang kam towardah leh eyyan-eyyan tiksah, subey niniyat leh-bi itu muwan kahapan. ³ Sabab katoonan-tabi bang taptap pagkahagad-tabi minsan ma jom katiksaan, ya na ili makapakosog

iman-sabal-tabi. ⁴ Hangkan na subey iman-sabal ya nipalan bang ma jom katiksaan, supaya kitabi minjari bal-iman maka mba niyah tasulang ma addat-tabiati-tabi. ⁵ Seyyan-seyyan ma joman-bi bilahi nigannapan panghati-na ma jom katiksaan, itu subey niamuh leh-na ni Tuhan. Sabab ikhlas Tuhan muwan ni kamemon ummat-na maka mba magkumud. ⁶ Sugah ma waktu-bi ngamuh, pagkahagad-bi subey min ikhlas pangateyan mba niyah pagduwa-duwa. Sabab bang áa mba tantu pangandol-na ma Tuhan, sapantun iya dikayuh amok tabowa pingga-pingga leh tiyup baliyu. ⁷ Aa beteh ili mba niyah taasahan-na min Tuhan, ⁸ sabab pikilan-na magduwa-ruwa ati kahinangan-na mba niyah katantuhan-na.

⁹ Bang niyah áa ma jamaa deyoh kalluman-na, subey du sab iya sigak sabab bilang dikayuh palsukuan Tuhan, íya dikayuh átaas. ¹⁰ Aa altaan subey du sab sigak ma kahalan-na bilang palsukuan Tuhan. Sabab katoonan-na altah-na mba makapataas ma iya ma pangandah Tuhan. ¹¹ Maka minsan masi gih iya miha daya, bang taabut na waktu-na, matey du iya. Sapantun sumping-sumping talun, bang kapanasan leh llow magtuwi du magkallosan maka magpappakan sampey takaat kamanisan-na.

¹² Sasukul áa malan sukul-sabal ma jom katiksaan, tantu nibarakatan leh Tuhan. Ya panungbas Tuhan ma iya ya na kasalamatan inyawa-na ni kasaumulan beteh bey panganjanjih Tuhan ma sagannap áa lasahan íya.

¹³ Bang niyah áa tasatsat ngahinang laati, subey mba pagsusunan-na Tuhan. Sabab Tuhan mba natsat maka mba du sab tasatsat. ¹⁴ Sabannal-na, ya makasatsat ma manusiyah bang iya tabowa leh saga napsu-na ngahinang laati. ¹⁵ Bang nidulan leh-na, makadusa iya. Puwas, bang nituwi-tuwihan gih leh-na, nalkah ya patudjuhan-na. ¹⁶ Hangkan na saga danakan-ku kalasahan, subey mba sáh pangahati-bi. ¹⁷ Sagannap ladjikih takka ma kitabi, Tuhan poonan. Ati kamemon ay-ay pamuwan-na asal tudju ni kahapan. Bulan maka llow bey paniyah-na ma diyatah langit, katallakan-siga maka waktu-na. Sugah Tuhan mba niyah kapindahan-na. ¹⁸ Min kahandak-na, ley kitabi magkahagad ma parman kasabannalan pasalan Al-Masih. Supaya min kamemon ummat-na, kitabi dahúh tahinang palsukuan-na.

¹⁹ Ebot-ebot saga danakan-ku kalasahan, subey kita pakale pahap ma pagkahi-tabi maka daa sahonoh-sahonoh nambung atawa likkas ngamanas.

²⁰ Sabab bang panas-atey nipalan, hunit ngahinang kabontolan panohoan Tuhan ma kitabi. ²¹ Hangkan na subey labbahan-bi na kamemon hinang kajowlakaan maka kalaatan. Puwas, pareyoun-bi pangateyan-bi naymah parman pasalan Al-Masih ya bey pamanduh ma kaam. Sabab ya na ili makabuwana kasalamatan ma inyawa-bi.

²² Daa sidja hal pakale ma parman sugah hinangun-bi gih saga panohoan-na. Sabab bang hal nipakale boh mba du nibeyah panduh-na, beteh du kam ngakkalan baran-bi. ²³ Kahalan-bi beteh manusiyah bey nanding baran-na ma samin ²⁴ sugah pag luwas-na magtuwi takaypat-na bang beteh ingga lowa-na sih.

²⁵ Maleyngkan bang kam taptap ngadjian parman bohoh nituman gih leh-bi maka mba nikaypat, kamemon kahinangan-bi nibarakatan. Sabab itu sarah umbul satu ya na makapatá ma kitabi min paldusahan.

²⁶ Bang niyah áa ngonan ndi-na áa mag-ammal íya, sugah maha tapanpan-na bowah-na missara laat, beteh du iya ngakkalan baran-na. Ati ya pag-ammal-na maha niyah kapusan-na. ²⁷ Ma pangandah Tuhan, ya pag-ammal sussi maka mba niyah tasulang-na, bang kita nabang ma saga balu maka saga anak iluh ma jom kasigpitan. Saltah patá gih kitabi min satsat kahinangan laat ma dunya.

2

¹ Saga anak-danakan-ku, bilang ámagparatsaya ma Panghuh-tabi Barakatan si Isa Al-Masih, ya addat-tabi subey mba nipagbiddah manusiyah. ² Sowpama, niyah duwa áa pasod meyah magsumbahayang. Dikayuh naan ádayahan maka pakeyan-na halgaan maka singsing-na bulawan gih. Ati ya dikayuh tu sih ámiskin maka pakeyan-na ndang na. ³ Puwas, ya nisagina leh-bi paháp ya na ádayahan, yuk-bi, “Piitu kow, ma mundaan kow nengkóh.” Sugah ya yuk-bi ma ámiskin sih, “Miili na sidja kow ma bulian.” ⁴ Bang beteh ili hinang-bi, salih kam huwis mba bontol pangahukum-na. Sabab lai nipagbiddah leh-bi ádayahan maka ámiskin. ⁵ Saga danakan-ku kalasahan, pakale kam! Sikeyya ba saga ámiskin ma dunya ya na ley tapeneh leh Tuhan nipakosog pagparatsaya-siga? Siga du sab ya na nipalsukuan kahapan ma jom okoman-na beteh bey panganjanjih-na ma sagannap álasahan íya. ⁶ Sugah kaam sab, ya hinang-bi nipadeyoh leh-bi saga ámiskin saltah nipadiyatah leh-bi ádayahan. Bistahun-bi sidja, seyyan ya daran ngandupang kaam sampey nakkahan kaam gih ni sarah ya maha niyah sababan-na? Sikeyya ba ádayahan? ⁷ Maka sikkeya ba ádayahan du sab ya na missara laat pasalan Nabi Isa Al-Masih ya na pameyaan-tabi? ⁸ Bang ma Al-Kitab, ya sarah umbul satu ma okoman parinta Tuhan ya na itu, “Kalasahin pagkahi-bi beteh kam lasahan baran-nu.” Bang sarah itu bannal nibeyah leh-bi, towwah hinang-bi. ⁹ Sugah bang ya hinang-bi nipagbiddah manusiyah, langgal sarah na kam. Hati-na, taga dusa na kam maka patut towwah hukuman. ¹⁰ Apa minsan dikayuh sidja sarah bey langgal-ta, ma pangandah Tuhan itungan kamemon na bey nilanggal. ¹¹ Ya pamintangan-tabi dikayuh gih parman ya yuk-na “Daa nganjina.” Dikayuh gih, “Daa mapatey manusiyah.” Ná, minsan kow maha bey nganjina, sugah bey kow mapatey manusiyah, taitung du kow álanggal sarah.

^a**2:8** - Niyah anu tasulat ma Markus jud 12, ayat 28-31 pasalan dikayuh guru Tawrat bey nilow Nabi Isa Al-Masih yuk-na, “Tuwan guru, min sarah panohoan Tuhan ma Nabi Musa, eyyan ya umbul satu toongan?” Ya sambung si Isa, “Wajib Tuhan kalasahan-bi min ikhlas pangatayan, inyawa, pikilan sampey na anggowtah baran-bi. Ya sarah pasunuh min ditu ya na itu, ‘Kalasahin pagkahi-nu bateh du kow lasahan baran-nu.’ Mba niyah sarah makaliyu min saga panohoan itu.”

¹² Hangkan na, kamemon bissara maka hinang-tabi subey mag-uyun maka sarah umbul satu sih ya na makapatá ma kitabi min paldusahan. Sabab ya na ili sarah pangahukum Tuhan ma kitabi. ¹³ Ati sasukul áa mba bey maaseh ma pagkahi-na, mba du sab nikaasean leh Tuhan. Maleyngkan sasukul áa maaseh ma pagkahi-na, nikaasean du sab leh Tuhan ma llow dambuli-na.

¹⁴ Saga dowranakan-ku, bang niyah ángonan ndi-na ámagkahagad ma Tuhan sugah mba niyah paltandaan kahinangan-na hap, ay kapusan pagkahagad-na? Selamat ba iya min nalkah leh pagkahagad beteh naan? Tantu mba! ¹⁵ Sowpama niyah áa ma jamaa-bi kulang pakeyan-na maka mba niyah kinakan-na, ¹⁶ ati ya pangahakah-bi ma iya, “Bang peen kow ma jom kasannangan. Maka bang peen nijukupan panemmek maka balanjah-nu.” Sugah mba minsan iya bey buwanan-bi ay-ay kagunahan-na. Bang beteh ili addat-bi, ay kapusan bissara-bi sih? ¹⁷ Damikiyan ma pagkahagad-tabi, mba niyah kapusan-na bang mba nipagbeyah maka kahinangan hap.

¹⁸ Pasalan áa magkahagad sih ya mba niyah paltandaan kahinangan-na hap, mareyh nisual leh ákasehean ya yuk-na, “Kau dikayuh ámagkahagad ma Tuhan. Aku sab dikayuh ángahinang kahapan. Na ay paltandaan pagkahagad-nu bang mba niyah tandah kahinangan-nu hap? Bang ma aku, kahinangan hap ya na paltandaan pagkahagad-ku. ¹⁹ Kau magsabannal dikayuh du Tuhan. Hap, sugah kulang gih. Apa minsan seytan, magsabannal du sab dikowh-kowh du Tuhan, sampey midpid gih leh kabisa talow-siga. Sugah masi du laat kahinangan-siga.

²⁰ Angey, kahunitan kow ngahati? Panduh ay gih kagunahan-nu supaya tahati-nu pasalan pagkahagad-nu mba niyah pus-na bang mba niyah paltandaan kahinangan hap? ²¹ Ya balikan-ta kahinangan ka-mboan-ta Nabi Ibrahim. Iya tu ley taitung leh Tuhan dikayuh ábontol sabab ma waktu-na bey sinohoh leh Tuhan nukbar anak-na si Isahak ma batu pagkulbanan, ley du nituman leh-na.

²² Min ditu, tahati-ta pagkahagad-na ley nipagbeyah maka kahinangan hap. Maka min bey hinang-na song ley jukup pagkahagad-na ma Tuhan. ²³ Beteh bey tasulat ma Al-Kitab ya yuk-i, “Si Ibrahim ley magkahagad ma parman Tuhan. Hangkan ley iya taitung dikayuh ábontol maka ley gih iya taonan ‘bagey Tuhan’.”

²⁴ Min kahalhiwalan itu, tahati-tabi bang beteh ingga áa taitung leh Tuhan dikayuh ábontol sabab min kahinangan-na. Hati-na, mba jukup pagkahagad-na bang mba nipagbeyah maka kahinangan hap.

²⁵ Dikayuh gih sab pamintangan-tabi si Mboh Rahab. Íya tu dikayuh danda bey makey baran-na pangusaha. Sugah ley du sab iya taitung dikayuh ábontol sabab ley tabang-na ma saga sundalu bangsa Yahudi bey sinohoh leh Tuhan piili ngispay ma lahat-na. Sabab ley siga nitapuk leh-na ma lumah-na sampey ley gih siga panduan-na lan paluwasan supaya siga mba tasaggow leh banta-siga.^b

^b**2.25** Mboh Rahab tu bey dikayuh ákafir min lahat Kanaan. Sugah ley du iya meyah magkahagad ma Allahu Taala. Puwas, ley iya nihinang handa leh dikayuh sundalu Yahudi bey nitabang leh-na. Jari, dikayuh min panubuh-siga ya na Nabi

²⁶ Ibarat anggowntah-baran, bang bakkat na napas-na, mba na niyah pus-na. Damikiyan sab pagkahagad, bang mba nipagbeyah maka kahinangan hap, mba du sab niyah pus-na.

3

¹ Saga anak-danakan-ku, bistahun-bi paháp bang kam ngangut tahinang guru. Sabab katoonan-tabi, buhat pangahukum Tuhan ma guru min áa sikeyya guru.

² Kitabi manusiyah asal daran makadusa. Sugah bang niyah áa tau magmandul ma bowah-na mba magdusa ma bissara-na, ya na ili dikayuh ábal-iman. Ati sampey addat-tabi-na tapagmandulan du sab leh-na. ³ Kahantang kurah bang takakkangan bowah-na, tapagmandulan piingga-piingga kabilahihan-ta. ⁴ Atawa sapantun adjung heya. Minsan baliyu kosog maragan íya, sugah bansan-na dikih-dikih ya na pamatiluh íya leh ámansan supaya tabowa pingga-pingga kabilahihan-na. ⁵ Damikiyan sab dellah manusiyah. Itu dikayuh panyap dikih ma baran, sugah kosog mag-abbu maka muwan kalengogan pag missara. Beteh talun heya bang talabuan sidja leh baga, magtuwi du tunuh sampey magsuleyaban na. ⁶ Ya ru dellah-tabi bang mba tabiat missara laat, beteh api makajuhalah ma addat-tabi sampey ni ginhawa-baran-tabi. Min kamemon panyap ma baran, itu muwan tiksah maka kalengogan. Ya poonan kalaatan-na min seytan maka min nalkah.

⁷ Kitabi manusiyah tau matsut ginisan sattuwa dilowt maka daleyá. ⁸ Sugah bowah-tabi hunit nipatsut mba missara laat. Ya bissara laat tu kahantang latsun makapatey ma manusiyah. ⁹ Bowah ya na nipakey leh manusiyah pamuji Tuhan ya na Panghuh maka Mmah-tabi ma sulgah. Puwas, bohoh ya na ru sab nipakey panumpah ma ummat-na ya bey pinapanjari leh-na niyah dasalian maka íya.

¹⁰ Hati-na, min dikayuh bowah, duwang ginis lapal paluwas ya na anu hap maka anu laat. Saga danakan-ku, subey sikeyya beteh itu. ¹¹⁻¹² Bistahun-bi sidja. Makajari bahah ma dikayuh tuburan, duwang ginis boheh paluwas? Atawa dikowh poonan duwang ginis buwah-na? Tantu mba. Kayu igira sikeyya buwah-na jaytun. Kayu anggul sab sikeyya buwah-na igira. Ya boheh pallat mba nuburan boheh dingin. Damikiyan sab kitabi bilang ummat Tuhan, ya lapal-tabi subey taptap tudju ni kahapan maka mba nilamuran kalaatan.

¹³ Bang niyah áa ma joman-bi lalom katau-na maka panghati-na, itu subey nipandaan ma addat maka kahinangan-na hap. Hati-na kamemon kahinangan-na min pangateyan magmareyoh ya na towp ma áa lalom pangitau maka panghati-na. ¹⁴ Sugah bang ya ma diyalom pangateyan-bi magjingki, atawa bang kon nipikil leh-bi baran-bi sidja, daa bantug-bi pangitau maka panghati-bi bey min Tuhan sabab mba bannal. ¹⁵ Pikilan beteh ili sikeyya min Tuhan sugah min saga manusiyah masi gih meyah ma pikilan seytan. ¹⁶ Hangkan na bang addat-tabi beteh ili nipalan, tantu ginisan hinang kalaatan maka kalengogan

ma paglahat.

¹⁷ Sugah bang ya nipalan pangitau maka panghati min Tuhan, ya tandah-tabi pikilan sussi maka bontol. Aa beteh ili ya na miha kasannangan. Heya iman-sabal-siga maka mba du sab siga hunit nipanduan. Tanyag siga maaseh maka ngahinang kahapan ma pagkahi-siga. Mba siga magsilang manusiyah, ati kamemon lapal maka kahinangan min ikhlas pangateyan-siga. ¹⁸ Aa tau mowa kasulutan maka malan paghatihan hap, kahantang ádapu huma hap sambu tinanom-na. Hangkan na bang addat-tabiati beteh itu nipalan, tantu niyah kabontolan maka kasannangan ma paglahat.

4

¹ Ay bahah poonan hangkan niyah pagbanta maka pagsasah ma jom jamaa-bi? Ya sababan, nidulan leh-bi napsu-bi ni kalaatan ya na muwan kalengogan ma pikilan-bi. ² Bang niyah pagnapsuhan-bi boh mba taalaha, atasan-bi gih monoh. Magsasah na kam sampey magbanta gih. Sugah mba du sab taalaha-bi sabab maha kam bey ngamuh ni Tuhan. ³ Sugah minsan du sab kam bey ngamuh ni Tuhan, maha du kam bey nidulan sabab sáh maksud-bi. Apa itu nipakey ma baran-bi sidja.

⁴ Kaam lu áa panipu! Sabab ya umbul satu ma pangateyan-bi sikeyya na Tuhan. Mba ba katoonan-bi, bang kahalan dunya nipaheya ma pangateyan-bi, Tuhan ya nisulang leh-bi. Hangkan na, seyyan-seyyan ngauyunan ongkah-ongkah dunya, taitung banta Tuhan. ⁵ Hangkan bey tasulat ma Kitab pasalan pamikil ley pamuwan Tuhan ma manusiyah, lai minjari hawahan maka panganjingki.

⁶ Sugah nitabang du sab kitabi leh Tuhan supaya kita mba tasatsat. Beteh bey tasulat ma Kitab ya yuk-i, “Bang áa taas pangateyan-na mba nidulan leh Tuhan. Sugah bang áa deyoh pangateyan-na nitabang leh-na.” ^c

⁷ Hangkan na, subey kam magmareyoh ma Tuhan. Saggain-bi satsat si Ibiris^d supaya iya patá min kaam. ⁸ Pasekot kam ni Tuhan. Ati Tuhan pasekot du sab ni kaam. Kaam saga ámasi gih ma jom pagdusa, teykutin-bi na dusa-bi. Saga áa masi gih magduwa-duwa, pasussihun-bi na pangateyan-bi. ⁹ Pagkarukkain-bi dusa-bi sampey tangisan-bi gih. Labbahin-bi na paglami-lami-bi boh paselleun-bi maka pagkarukkaan tandah ikhlas pangateyan-bi magtowbat.

¹⁰ Puwas, magmareyoh gih kam ni Tuhan maka nipataas du kam leh-na.

¹¹ Saga dawranakan, daa kam ngalimut atawa missara anu makapakaat ma pagkahi-bi ma jamaa. Apa bang pagkahi-bi nipakaat atawa nihukum leh-bi, beteh du kam bey makaat maka ngahukum sarah Tuhan. Beteh maha niyah pus-na ma kaam sabab mba nibeyah leh-bi. ¹² Sabannal-na, Tuhan ya na dikowh-kowh taga kapatut matannah sarah atawa ngahukum ma manusiyah. Ngkon iya magbayah-bayah bang seyyan maka ni sulgah atawa ni nalkah. Sugah

^c4:6 - Tabassa ma Kitab Jabur, Lapal Kabtangan sura 3, ayat 34.

^d4:7 - Ibiris, ya na nakurah seytan.

kaam, mba niyah kapatutan-bi ngahukum pagkahi-bi manusiyah.

¹³ Na kaam sab saga áa takabbul, pakale kam. Ya lling-bi, “Pahalu atawa sumulai, tulak kami ni lahat siddi maglitu-litu saga dantahun, supaya kami magdaya.”

¹⁴ Angey, takoonan-bi karal-bi ma sinóng? Mba! Minsan umul-bi mba tabattah-bi. Sabab itu sapantun ambun, deyh du tandah bohoh lanyap du sab.

¹⁵ Hangkan na beteh itu subey lling-bi, “Insha Allah, muramurahan tahah umul-kami maka nowwah maksud-kami.” ¹⁶ Apa sittau kam mag-abbu ma garah-bi. Na, itu taitung dusa ma pangandah Tuhan.

¹⁷ Entomun-bi, bang niyah kahapan patut nihinang leh-bi, wajib subey nituman. Apa bang mba, makadusa kam.

5

¹ Na kaam lu saga ádayahan, pakale kam. Subey kam magtangisan maka magsindilan sabab leh hukuman song pinatakka ma kaam. ²⁻³ Sabab heka althah bey nitagama leh-bi ma baran-bi sidja boh deyh na patakka llow kiyamat. Althah-bi ley magkaatan na lamud na sampey semmek-bi maggoggotan na. Ya du sab bulawan maka pilak-bi lai na nikapu-kapu ma jom panaguan-na. Jari, ya kapu-kapu sih ya na tahinang saksi ma llow kiyamat pasalan kakeykitan-bi. Itu beteh api song makakaat kamemon sampey baran-bi. ⁴ Ya ndah-ta gih saga áa bey magsangsah ma huma-bi mba minsan bey nigajihan leh-bi. Hangkan na tangis-siga ley du makatakka ni Tuhan Sangat Kawasa. ⁵ Kaam sab, minsan deyh na llow pangahukum, ya ngkon isbat-bi magdaya, ngandulan napsu-bi maka magparasahan hap miitu ma dunya. ⁶ Minsan saga ábontol ya mba bey naggaan kaam, ley gih takkahan-bi ni sarah sampey tawakkalan-bi nipapatey.

⁷ Ebot-ebot ni saga dowranakan-ku, iman-sabal ya subey nipalan satoggol-tabi nganggaran llow pabalik Panghuh-tabi. Ya pamintangan-tabi addat ámaghuma nganggaran waktu magbuwaan tinanom-na. Iman maka sabal ya nipalan satoggol-na ngagaran ulan ma waktu pagtanom maka ma waktu pagbuwah.

⁸ Damikiyan du sab kitabi subey iman-sabal maka hogot pangandol-tabi, sabab mba toggol pabalik na Panghuh-tabi. ⁹ Daa mung-mungan-bi atawa pagsusunan-bi saga danakan-bi ma jamaa, supaya kam mba towwah hukúman. Sabab deyh-na llow pangahukum Tuhan ma manusiyah.

¹⁰ Saga dowranakan-ku, pasalan iman-sabal ma jom katiksaan, niyah gih tapamintangan-tabi ya na kanabi-nabihan bey masampey parman ma owwal jaman. ¹¹ Asal du katoonan-bi, siga tu niitung ma jom barakat sabab leh iman-sabal-siga. Bey na takale-bi pasalan Nabi Ayyub bang beteh ingga bey tatasan-na katiksaan bey nowwah ma siga. Katoonan-tabi du sab bang ay bey panungbas Tuhan ma iya. Sabab heya aseh-lasa Tuhan ma kamemon saga ummat-na.

¹² Saga danakan, bang niyah bissara-bi ay-ay, ebot daa pagbeyah-bi maka sapa. Hati-na daa kam napa maka ón sulgah atawa dunya atawa ón ay-ay. Bang

yuk-bi, “Ahoh,” subey du sab “Ahoh” sidja. Bang yuk-bi “Mba,” subey du sab “Mba” sidja. Daa konnopin-bi maka sapa, supaya kam mba towwah hukuman Tuhan.

¹³ Bang niyah ma jamaa-bi áa ma jom kasusahan, subey iya ngamuh tabang ni Tuhan. Aa ma jom kasigakan sab subey ngalang kalangan pamuji Tuhan. ¹⁴ Bang sab áa mba hap parasahan-na, subey soho-na nialah kaimaman ma jamaa supaya iya taamuan-siga tabang ni Tuhan saltah tapeheran kok-na maka insallan ma ón kawasa Panghuh Isa Al-Masih. ¹⁵ Bang min ikhlas pangateyan-siga mangandol maka ngamuh, kaulian du iya. Pinakosog baran-na maka sampey dusa-na niampun gih. ¹⁶ Hangkan na, subey kam magsabannal pasalan dusa-bi maka ngamuh ampun gih dangan parangan. Maka amuin-bi duwaa gih dangan-parangan supaya taulian sakki-bi. Sabab bang manusiyah sussi maka bontol pangateyan-na, duwaa-na nikabbul leh Tuhan. ¹⁷ Beteh Nabi Ilyas bey awal jaman. Iya tu dikayuh manusiyah beteh-tabi du sab. Bey iya ngamuh junjung ni Tuhan bang peen mba nipaulan ma paglahat. Ná, ma jom tallun tahun maka tongah mba du bey ulan.^e ¹⁸ Puwas, ley na sab iya ngamuh pabing bang peen niyah ulan. Minjari, ley du niyah ulan pabing maka ley na magtomoan saga tinanom sampey magbuwaan na sab pabing.

¹⁹ Saga dowranakan-ku, bang niyah sekeh-bi ma jamaa mba na meyah ma panduh ni kasabannalan, boh niyah sab dikayuh áa ma jamaa makabowa iya pataptap pabing, itu tabang heya. ²⁰ Entomun-bi bang niyah áa tabowa-bi neykutan dusa-na, áa ili talappasan min nalkah maka kamemon dusa-na niyah na kaampunan.

Wassalam.

^e**5.17** Ma waktu si Ilyas bey magnabi, ya áa magsultan ma paglahat ya na si Ahab. Sultan Ahab tu mba bey maruli saga panohoan Tuhan. Laat toongan kahinangan-na numba barhalah maka nukbar anak-anak gih nitunuh ni tuhan-tuhan-na si Baal. Hangkan Nabi Ilyas ley ngamuh junjung ni Tuhan bang peen pinatowwah mulkah ma paglahat mba na nipaulan supaya papinda addat sultan maka song iya talow ma Tuhan.